

*vice colateral, mandato in Dalmatia, date a dì 11 novembrio.* Come havia fato le mostre di stratioti Piero di Thodaro Frassina, capo di cavali 21, mal conditionati. À cassà cavali 10. Et ha trovà stratioti 11, computà el capo, è Anzolo Frassina, senza li cavali. Dicono averli persi in la scaramuza con li banoaci sto zugno; il resto è fameglj senza cavali. È stà acceptà stratioti 11 con il capo, e Anzolo senza cavalo. Et havia in caxa 6 zoveni di 15 fin 24 anni. Dicea esser soi nipoti e non erano, et geli hanno cassis; però voria venirsi doler a Venexia. *Item*, a domino Zorzi Pagomeno capo di cavali 21, ha fato bella mostra, acceptà cavali 14, il resto cassi per esser famegli. El qual à le persone numero 5; voria qualche provisione di più; *etiam* lui voria venir a Venexia. *Item*, a domino Nicolò Paleologo capo di cavali 21, mal conditionati, ha acceptati 13, et havia 5 cavali in caxa; e Thodaro Rali è in questa compagnia, qual, per esserli casso il fameglio, dice non volerli star. *Item*, li stratioti dil Frassina e Paleologo si hanno dolto non haver nè biava, nè li danari, ma li capi li tuo'; però aricorda *de cætero* saria bon li danari fossero dati per man dil camerlengo a homo per homo. *Item*, ha alozato Piero de Federicis, Marco da Canal et Manoli Paleologo in questo. In tutto dovea esser cavali 63 levantini, et sono *solum* 50 per esser cassi li fameglj *Item*, li cavali paesani ha fato la mostra, è mediocri; ma li homeni stanno in caxa di li patroni; pur à casso alcuni cavali, e questi poleno meglio servir cha li stratioti, perchè hanno la biava, come a bocha dirà il tutto. *Item*, ha fatto la mostra a le fantarie, mal in hordine, *excepto* la compagnia di Vincenzo da Venexia contestabile a la porta, con page 31, et la compagnia di Bernardin di Treviso uno de li contestabili cassi. *Solum* à cassi di li fanti page 28 fra tutti li contestabili; ma non si troverà 30 boni fanti. *Item*, è andato a Lavrana a far la mostra; trovò quelle monition mal in hordine e mal tenute, et esser una cortina di muro ruinata, per il qual loco facilmente si potria ascender sul castello. *Item*, fo a Nadino, dove è un caporal con page 11; non li è vituarie, salvo pocho pan, che ogni di lo comprano. *Item*, a Novegradi le monition è ben tenute, salvo li manca uno bombardier. *Item*, a Nona à trovà la mazor parte di le artilarie drio li muri discoperte e mal conditionate, state cussi dal tempo di turchi che vene in qua; sichè *etiam* li bisogna uno bombardier. *Item*, ha compartì li stratioti, *videlicet* cavali 30 stagino a Lavrana, 30 a Novegradi, et 40 a Nadin per eustodia; ma prima bisogna spender a Nadin ducati 50 per far li alozamenti,

et a questi li darano le ville harano a custodir. *Item*, li Tetrici dicono le persone mai anderà, ma ben la compagnia loro; pur li ha fatto comandamento vadino. *Item*, è stà in castel di Zara, dove è page 50; alcuni hanno mojer di Zara. In citadela è page 15, à cassà 2. *Item*, si parte e va a Sibinicho a far questo efecto.

*Di sier Hironimo Barbaro dottor et cavalier, conte, e sier Bartolamio Marin capitano.* Scriveno laudando esso vice colateral, e quelli capi voleano venir a Venexia li hanno usà bone parole. *Item*, li stratioti cassi, voleano danari dil servito. *Item*, bisogna danari per restaurar li alozamenti, nè di quella camera si pol trar un soldo; e per il castello di Zara bisogna ducati 40 per instaurar le stalle è lochi di le monition; e ducati 50 per Novegradi, *licet* sperano reeuperar ducati 40 quali *alias* fo mandati a tal efecto; et hanno mandato Antonio Girlando fiol dil signor Anzolo. *Item*, li stratioti voleano levar le so bolete, *tamen* non si pol, per la parte, si non a quelli anderano a star di fuori; sichè non sanno che far.

Et per un'altra lettera, essi rectori, di 18 novembrio, avisa il successo di sier Piero Sagredo a Scardona con li nontj regj, come si ave da lui per avanti, et mandano lettere et le comissione etc. Si duol el sia partido di Scardona senza avisarli nulla. *Item*, a dì 17 riceveteno lettere nostre con la nova di la creatione di papa Julio II<sup>o</sup>, et fu fatto feste.

Da poi disnar, fo Consejo di X con zonta di Collegio e altri, e prima li savj fosseno chiamati, fo alidito li capitoli de li oratori di Rimano, presenti essi oratori. Li qual erano quasi tutti disonesti; il sumario di quali serano qui avanti scripti, *adeo* non parve quasi di meterli in disputatione di risposta. Et loro medemi disse, se fosseno tropo, la Signoria conzi come li par, e darano loro informatione.

*Item*, in Consejo di X fo terminato dar ducati 2000 a l'armamento da pagar galioti per queste feste, a galia per galia, uno sexto per uno, justa il consueto; e vi va un savio dil Consejo e un savio di terra ferma usidi di Colegio.

In questo zorno fo expedi, poi 3 conselj in la quarantia novissima, il caso menato per sier Piero di Priovi avogador, qual fa comandamento a sier Marco Loredan, è ai 3 savj, che non se impazi in le cose e conti dil zeneral, et *maxime* perchè è cazado, atento che 'l capitano zeneral sier Beneto da cha' da Pexaro fè tajar la testa a sier Marco Loredan; et è casi presi che niun se impazi, *ut patet*, quel dil fio dil doxe da cha' Foscarei, e di sier Giacomo More-